

Conferencia Linguistico Internacional e fin di siman aki

ORANJESTAD -- Fundacion Lanta Papiamento ta organisa Conferencia di SCL 2014 na Aruba. Esaki lo ta e di 20 Conferencia Bienal di SCL y lo tuma luga na Holiday Inn Resort e fin di siman aki, di dia 5 pa dia 8 di augustus 2014.

E tema principal di e Conferencia ta The Caribbean Today: Language Awareness and Language Development (Caribe awe: Consenshi Linguistico y Desaroyo di Lengua). E organisadonan ta haci un peticion na tur linguista di Caribe y personanan interesa rond mundo pa manda nan resumen tratando un tema tocante cualke sorto di lenga di Caribe: lenga Pidgin, lenga papi y lenga di seña, lenga Amerindio (Indjan), lenga Crioyo, tur variedad di lenga standarisa, lenga oficial y

lengua no-standarisa, lenga di inmigrante, lenga di herencia historico, lenga den peligro di extincion y lenga religioso y ritual. Ta invita particularmente pa manda tur sorto di resumen perteneciente na temanan y situacionnan linguistico di Aruba, Boneiro y Corsou cu un enfoque particular riba Papiamento (den cualke subdisciplina linguistico).

Fundacion Lanta Papiamento (FLP) ta anfitrión na Aruba di e conferencia di Society for Caribbean Linguistics (SCL) y ta organisa esaki conhuntamente cu Society for Pidgin and Creole Linguistics (SPCL) y Associação de Crioulos de Base Lexical Portuguesa e Espanhola (ACBLPE).

Meta di Bienal di SCL
E metanan di SCL ta di pro-

move estudio di idioma cu un enfoque special riba Caribe y envolve hende interesa di tur parti di mundo. Tur investigacion y publicacion di e miembronan di SCL semper tabata dirigi riba linguistica teoretico y aplica cu un atencion creciente pa e papel y desaroyo di idioma den educacion den Caribe. Nan ta investiga e idiomanan di Caribe di tur origen y epoca, incluso e idiomanan Indjan for di epoca precolombino y e idiomanan di e epoca colonial tanto Europeo, Africano como Asiatico y specialmente e idiomanan Crioyo Caribense.

Por considera e miembronan di SCL pionero riba tereno di reconocimiento y estudio di e idiomanan crioyo aki. SCL, pues, ta enfoca riba estudio di e idiomanan y e situacion di idioma di e teritorionan insu-

lar y continental di Caribe y otro teritorio cu laso historico y actual cu Caribe. Ta haci investigacion tambe di idioma di comunidad di origen Caribense rond mundo. SCL ta invita y encurasha academico, estudiante, educador, escritor y publico general pa participa na su conferencianan.

Na e conferencianan aki por participa na charla, tayer, presentacion di poster y presentacion plenario. Y semper tin oportunidad amplio pa participa den discusion linguistico. Pa nos pais Aruba esaki ta un oportunidad grandi pa presenta na mundo loke nos a logra den e ultimo añanan y pa adkiri mas conocimiento y contacto, loke ta asina importante den e fase di desaroyo cu nos ta aden.

Programa: Por pidi e programa completo via re-

inold66@hotmail.com. Tin diferente orador principal, esta Dr. Mervyn Alleyne di Jamaica, Dr. Manuel Veiga di Cabo Verde, Dr. Marta Dijkhoff y Dr. Ronald Severing di Corsou, y Ramon Todd Dandaré Mag. Ling. di Aruba. Importante pa menciona ta cu na e conferencia lo tin un Sala di Papiamento, na unda lo tin un programa special relaciona cu Papiamento. Lo enfoca aki riba idioma Papiamento, su historia, su literatura y otro expresionnan artistico, su luga y papel den enseñansa y den comunidad. Fundacion Lanta Papiamento ta invita en particular tur linguista, educador y estudiante di idioma, y en general tur otro persona interesa di Aruba, Boneiro y Corsou pa participa na e Conferencia Linguistico importante aki cu lo tuma luga di 5 pa 8 di augustus 2014 aki na Aruba. □